

摘藻堂四庫全書薈要

子部

欽定四庫全書薈要

子部

御定淵鑑類函卷三百九十二

三

欽定四庫全書薈要卷一萬一千八百四十

子部

御定淵鑑類函卷三百九十二

食物部五酒

酒

酒一

原說文曰酒就也所以就人性之善惡也一言造也吉
凶所起造也 又曰醑酒母也醴酒一宿熟也醪汁滓
酒也酎三重之酒也醕薄酒也醕首酒也 釋名曰酒
酉也釀之米麴酉懌而味美也 增飲膳標題曰酒一

也而清濁厚薄甜苦紅綠白之別故清者曰粟清而甜者曰醅濁者曰醢亦曰醢濁而微清者曰醖厚者曰醇亦曰醪重釀者曰酎三重釀曰酎薄者曰醑甜而一宿熟者曰醴美者曰醕苦者曰醑紅者曰醖綠者曰醪白者曰醢又有酒材焉秫稻是也又有酒母麴蘖是也又曰踑也能否皆強相踑持也又入口咽之皆踑其面也 酒經曰空桑穢飯醖以稷麥以成醇醪酒之始也 烏梅女麴甜醪九投澄清百品酒之終也 易曰有孚

于飲酒濡其首 書曰甘酒嗜音峻宇雕牆 又曰民

用大亂喪德亦罔非酒惟行越小大邦用喪亦罔非酒

惟辜 又曰文王誥教小子有正有事無彝酒 原詩

曰為此春酒以介眉壽 又曰魚麗于留鱠魴君子有

酒旨且多 又曰為酒為醴烝畀祖妣以洽百禮 增

又曰凡此飲酒或醉或否既立之監或佐之史 又曰

人之齊聖飲酒溫克 又曰王在在鎬豈樂飲酒 又

曰有酒湑我無酒酤我 原周禮曰酒人共賓客之禮

酒飲酒而奉之

又曰酒正掌酒之政令以式法授酒

材辨五齊之名一曰泛齊二曰醴齊三曰盎齊四曰醞
齊五曰沈齊辨三酒之物一曰事酒二曰昔酒三曰清
酒 增又曰孟冬命有司秣稻必齊麴蘖必時湛熾必
潔水泉必香陶器必良火齊必得兼用六物酒官監之
無有差忒 原禮記曰豢豕為酒非以為禍而獄訟益
繁則酒之流生禍也是故先王為酒禮一獻之禮賓主
百拜終日飲酒而不得醉焉此先王之所以備酒禍也

又曰飲酒之節朝不廢朝暮不廢夕 增又曰侍飲

於長者酒進則起拜受於尊所長者辭少者反席而飲
長者舉未釂少者不敢飲 論語惟酒無量不及亂沽

酒市脯不食 韓詩外傳曰夫飲之禮不脫屨而即序

者謂之禮跣而上坐者謂之宴能飲者飲之不能飲者

已謂之醜 歐叶 齊顏色均衆寡謂之沈閉門不出者謂

之湏故君子可以宴可以醜不可以沈不可以湏 春

秋緯曰酒者乳也王者法酒旗以布政施天乳以哺人

又曰麥陰也黍陽也先漬麴而投黍是陽得陰而沸

故以麴釀黍為酒 又曰凡黍為酒陽據陰乃能動故

以麥釀黍為酒 原春秋元命苞曰酒旗主上尊酒所

以侑神也 儀禮鄭注曰醴稻米酒也 漢書曰百味

旨酒芬布蘭生 輿地志曰若溪在長興縣南溪南曰

上若北曰下若邗人取下若水釀酒醇美勝雲陽 國

史補曰滎陽之土窟春富平之石梁春酒色也 呂氏

春秋曰肥肉厚酒務以相強命曰爛腸之食 增石氏

星經曰酒醪五齊之屬天文酒旗星主之揚子曰日

昃不飲酒酒必酸賓主百拜而酒三行不已華平論

衡曰東風至酒湛溢按酒味酸從東方木也味酸故酒
湛溢也十洲記曰瀛洲有玉膏如酒味名曰玉酒飲

數升輒醉乃令人長生原神異經曰西北海外有人

長二千里兩腳中間相去千里腹圍千六百里但日飲

天酒五斗天酒甘露也不食五穀魚肉忽有飢時向天乃飽

好遊山海間不犯百姓不干萬物與天地同休又曰

西北荒中有玉饋之酒酒泉注焉酒美如肉清如鏡其上
有玉樽取一樽復一樽出與天地同休無乾時飲此
酒人不死長生 博物志曰西域有蒲萄酒積年不敗
彼俗傳云可至十年欲飲之醉彌日乃解 抱朴子曰
麟鳳洲以玉泉為醪醴 崔氏四民月令曰正月旦進
椒酒降神畢各舉椒酒於其家長 袁子正論曰長安
九釀中山清醕 郭子曰三日不飲酒覺形神不復和
酒自引人入勝地耳 齊民要術曰桑落酒有六七投

者酒以投多為善要其麴力相及醱酒所以有韻者亦以其再投故也 白孔六帖曰糯米一斗得酒一斗為上樽稷米一斗得酒一斗為中樽粟米一斗得酒一斗為下樽 增霏雪錄曰河東桑落坊有井每至桑落時取水釀酒甚美故名桑落酒 嶺表錄異曰南中醞酒即先用諸藥別濁漉粳米漉乾旋入和米搗熟即綠粉矣熱水溲而團之形如餠餠以指中心刺作一竅布放簟席上以枸杞構葉罨之其體候好弱一如造麴法既

而以藤蔑貫之懸於煙火之上每醞一年用幾箇餅子
固有恒準矣南中地煖春冬七日熟秋夏五日熟既熟
貯以瓦瓮用糞掃火燒之 投荒雜錄曰新州多美酒
南方不用麴蘖杵米為粉以衆草兼胡蔓草汁漉大如
卵置蓬蒿中蔭蔽經月而成用此合濡為酒故劇飲之
後既醒猶頭熱泔泔有毒草故也 又曰南方飲酒即
實酒滿瓮泥其上以火燒方熟不然不中飲既燒即揭
瓶趨虛泥固猶存活者無能知其美惡就泥上鑽小穴

可容筓以細筩插穴中沽者就吮筩上以嘗酒味俗謂之滴淋無賴小民空手入市徧就酒家滴淋皆言不中取醉而還 又曰南人有女數歲即大釀酒既漉候冬陂池水竭時寘酒甕密固其上瘞於陂中至春漲水滿不復發矣候女將嫁因決陂水取供賓客南人謂之女酒味絕美居常不可致也 真臘風土記曰美人酒於美人口中含而造之一宿而成尤竒 野客叢書曰真州郡齋舊有酒名花露姚合詩味輕花上露色似洞中

泉得非取此乎 避暑錄話曰舊有釀法盛夏三日輒

成色如漣醴不減玉友每晚涼即飲三杯亦復盎然

酒譜曰凡酒以色清味重為聖色如金而醇苦者為賢

色黑味酸醜者為愚以家醪糯釀醉人者為君子以家

醪黍釀醉人者為中人以巷醪黍釀醉人者為小人

又曰飲器大者曰武小者曰文 醉鄉日月曰或有勇

於牛飲者以巨觥沃之既撼狂花凋病葉飲流謂目睚

者為狂花目睡者為病葉 又曰暑月雷霆時收雨水

淘米炊飯釀酒名曰霹靂酒 又曰酒徒謂不飲者歡

場之害馬 醉仙圖記曰凡醉有所宜醉花宜晝襲其

光也醉雪宜夜消其潔也醉樓宜暑資其清也醉水宜

秋泛其爽也 又曰祿州俗釀宜趁梨花時熟號梨花

春 致虛散錄曰山居嵐重每旦帶皮薑細嚼熱酒下

之 楚辭曰蕙肴烝兮蘭藉奠桂酒兮椒漿 注曰切桂於酒中

又曰四酎并熟不踴噬只清馨凍飯不歎役只吳醴

白蘘和楚漑只 魏文帝詔朝臣曰蒲萄釀以為酒過

之流涎咽唾况親飲之 又曰蓋聞千鍾百觚堯舜之
飲也惟酒無量仲尼之飲也姬旦酒肴不徹故能制禮
作樂漢高婆娑巨醉故能斬蛇鞠旅

酒二

原世本曰儀狄始作酒醪變五味少康作秫酒 增三
禮圖曰射為罰爵名豐作人形豐國名其君以酒亡因
戴孟以戒酒故崔駰酒箴云豐侯沈酒荷罌負缶自僂
於世圖形戒後 管子曰齊桓公飲管仲酒仲棄其半

曰臣聞酒入舌出舌出言失言失身棄臣以為棄身不
如棄酒 左傳曰陳公子完奔齊飲桓公酒樂公曰以
火繼之辭曰臣卜其晝未卜其夜 韓子曰齊桓公飲
酒醉遺其冠恥之三日不朝管仲曰此非有國之恥也
公胡不雪之以政公曰善因發倉賜貧窮論囹圄出薄
罪處三日而民歌之曰公胡不復遺冠乎 原史記曰
晉擊秦穆公傷於是岐下食善馬者三百人馳冒晉君
圍遂脫穆公而返生得晉君初穆公亡善馬岐下野人

共得而食之者三百餘人逐得欲法之公曰君子不以
畜害人吾聞食善馬肉不飲酒傷人乃皆賜酒而赦之
增左傳曰晉侯飲趙盾酒伏甲將攻之其右提彌明
知之登曰臣侍君宴過三爵非禮也遂扶以下 原又

曰晉侯戰于鄢陵晉使行人執榼承飲造于子重曰寡
君乏使鍼御持矛是以不得犒從者使某攝飲子重曰
夫子嘗與吾言于楚必是故也不亦識乎受而飲之免
使者而復鼓 又曰穀陽豎獻飲于子反子反飲之而

醉不能見楚子遂宵遁敗楚軍也 王孫子曰楚莊王

攻宋子重曰君廚肉臭而不可食樽酒敗而不可飲而
三軍之士皆有飢色欲以勝敵不亦難乎莊王曰請有
酒投之士有食饋之賢 左傳曰晉侯以齊侯宴中行

穆子相投壺晉侯先穆子曰有酒如淮有肉如坻寡君
中此為諸侯師中之齊侯舉矢曰有酒如澠有肉如陵
寡人中此與君代興亦中之 又曰鄭伯有嗜酒為窟
室而夜飲酒擊鐘焉朝至未已朝者曰公焉在其人曰

吾公在壑谷 增又襄公二十三年曰季武子無適子

公彌長而愛悼子欲立之訪於臧紇曰飲我酒吾為子
立之季氏飲大夫酒臧紇為客既獻臧孫命北面重席
新樽絜之召悼子降逆之大夫皆起及旅而召公鉏使
與之齒 又曰衛侯占夢嬖人求酒于大叔僖子不得
與卜人比而告曰君有大臣在西南隅弗去懼害乃逐
大叔遺遺奔晉 又齊慶封好田而嗜酒與舍政則以
其內實遷於盧蒲嫫氏易內而飲酒數日國遷朝焉

又曰齊惠樂高氏皆嗜酒信內多怨彊於陳鮑氏而惡之夏有告陳桓子曰子旗子良將攻陳鮑氏亦告鮑氏桓子授甲而如鮑氏遭子良醉而騁遂見文子則亦授甲矣使視二子則皆將飲酒桓子曰彼雖不信聞我授甲則必逐我及其飲酒也先伐諸陳鮑方睦遂伐樂高氏 呂氏春秋曰勾踐欲深得民心肥甘弗敢自御有酒流之於江與民同之 原戰國策云梁王魏嬰觴諸侯於范臺酒酣請魯君舉觴魯君興避席曰昔者帝女

令儀狄作酒而美進之禹禹飲而甘之遂疏儀狄絕旨

酒曰後世必有以酒亡其國者 史記曰齊威王問淳

于髡曰先生能飲幾何對曰臣飲一斗亦醉一石亦醉

王問故髡曰賜酒大王之前執法在前御史在後髡恐

懼飲不過一斗若乃履舄交錯盃盤狼籍堂上燭滅主

人留髡而送客當此時髡心最歡能飲一石 孔叢子

曰平原君與子高飲強子高酒曰昔有遺諺堯舜千鍾

孔子百觚子路嗑嗑尚飲百榼古之賢聖無不能飲吾

子何辭焉子高曰以予所聞聖賢以道德兼人未聞以
飲也平原君曰即如先生言則此言何生子高曰生於
嗜酒者蓋其勸勵之辭非實然也 史記曰高帝悉去

秦苛法為簡易羣臣飲酒爭功高帝患之叔孫通知上
益厭也說上願徵諸弟子共起朝儀後七年長樂宮成
羣臣皆朝十月禮畢復置法酒諸侍坐殿上皆伏尊卑
次起上壽觴九行謁者言罷酒御史執法舉不如儀者
輒引去竟朝置酒無敢失禮者高帝乃曰吾今知為皇

帝之貴也 增又曰曹參代蕭何為相一遵何約束日

夜飲醇酒卿大夫及賓客見參不事事皆欲言至者參
輒飲以醇酒醉而後去終莫得開說丞相舍後園近吏
舍吏舍日飲歌呼從吏惡之無如之何乃請參游園中
吏醉歌呼從吏幸相國召按之乃反取酒坐飲亦歌呼
相應和 西京雜記曰漢制以正月旦造酒八月成名
曰九醞一名醇酎 漢武內傳曰西王母當下帝設蒲
萄酒王母謂帝曰仙家上藥有玉酒瓊瑤酒 漢書曰

武帝立酒泉郡 原東方朔別傳曰武帝幸甘泉長平
坂道中有蟲赤如牛肝頭目口齒悉具先驅馳還以報
上使視之莫知也時朔在屬車中令往視焉朔曰此謂
怪哉是必秦獄處也上使按地圖果秦獄地上問朔何
以知之朔曰夫積憂者得酒而解乃取蟲置酒中立消
賜朔帛百匹後屬車上盛酒為此也 增緝柳編曰糜
欽棗出真陵山食一枚大醉經年不醒東方朔嘗遊其
地以一斛進上上和諸香作丸大如芥子每集羣臣取

一丸入水一石頃刻成酒味如醇醪謂之糜飲酒又謂之真飲酒仙薌酒香經旬不歇 西京雜記曰司馬相如還成都以所服鷓鴣裘就市易錢貫酒與卓文君為歡 漢書曰丙吉馭吏嗜酒醉嘔丞相車上西曹主吏欲斥之吉曰以醉飽之失去士使此人將復何所容西曹忍之此不過汙丞相車茵耳 漢書曰陳遵字孟公每大飲賓客閉門取車轄投井雖有急終不得去 洛陽記曰揚雄家貧嗜酒人希至其門時有好事者載酒

問竒字 抱朴子曰管輅頓傾三斗而清辨綺粲揚雄
酒不離口而太元乃就 風俗通曰陳國有趙祐者酒
後自相署或稱亭長督郵祐復於外騎馬將降旛云我
使者也司徒鮑宣決獄云騎馬將旛起於戲耳無他惡
意 又曰汝南張妙酒後相戲逐縛捶二十下又懸足
指遂至死鮑昱決事云原其本意無賊心宜減死 後
漢書曰更始夫人尤嗜酒每侍飲見常侍奏事輒怒曰
帝方對我飲正此時持事來乎起抵破書案 孝子傳

曰蔡順字君仲母飲酒吐嘔恐母中毒嘗吐驗之 龍

城錄曰蔡邕因醉路卧人名曰醉龍 續漢書曰盧植

能飲一石不醉 原燉煌張氏傳曰扶風孟佗以蒲萄

酒一斗遺張讓即拜涼州刺史 神仙傳曰壺公詣費

長房於樓上曰我有少酒相就飲之酒在樓下長房使

人取之不能舉盎至數十人莫能得上乃白公公乃下

以一指提上與房共飲之酒器如拳許大飲之至暮不

竭 增列仙傳曰孔元方者專修道術惡衣疏食飲酒

不過一斗年百七十餘歲道成人或請元方同會人人
作酒令次至元方作令元方無所說直以一杖柱地因
把杖倒豎頭在下足在上以一手持酒倒澆之莫能為
也 神異經曰劉元石曾於中山酒家沽酒酒家與千
日酒飲之至家大醉其家不知以為死葬之後酒家計
有千日往視之云已葬於是開棺醉始醒俗云元石飲
酒一醉千日 原志怪曰齊人田無已釀千日酒過飲
一斗醉卧千日 魏略曰太祖禁酒而人竊飲故難言

酒以白酒為賢者清酒為聖人 增又曰鍾毓與鍾會

少有令譽其父晝寢因共偷服散酒父託寐以觀之毓
拜而後飲會飲而不拜父問其故毓曰酒以成禮不敢
不拜問會會曰偷本非禮所以不拜 魏志曰邴原初
辭家求學原舊性能飲酒自行之後八九年間酒不向
口單步負笈苦身持力至陳則師韓子助潁川則宗陳
仲弓汝南則交范孟博涿郡則親盧士幹臨別師友以
原不飲酒會米肉送原原曰本能飲酒但以荒思廢業

故斷之耳今當遠別因見貺餞可以飲讌於是坐飲終日不醉世語曰王浚表滿寵年過耽酒不可居方任帝將召寵給事中郭謀曰寵為汝南太守豫州刺史二十餘年有勲方岳及鎮淮南吳人憚之若不如所表將為所闕可令還朝問以方事以察之帝從之寵既至進見飲酒至一石不亂帝慰勞遣還又曰華歆能劇飲至石餘不亂衆人微察常以其整衣冠為異又曰烏桓東胡俗能作白酒而不知作麴蘖常仰中國珊瑚

鈞詩話曰歷城北有使君林魏正始中鄭公愨三伏避

暑於此取大蓮葉置硯格上盛酒三升以簪刺葉令酒

與柄通屈莖輪囷如象鼻馬持吸之薶氣清冽名曰碧

筒酒 原魏氏春秋曰阮籍以世多故祿仕而已聞步

兵廚多美酒營人善釀求為校尉也 增蜀志曰孔明

戒子曰夫酒之設合禮致情適體歸性禮終而退此和

之至主意未殫賓有餘豪可以至醉無致於亂 原吳

志曰鄭泉臨卒時語同輩曰必葬我陶家之側庶百歲

之後化而為土幸見取為酒壺實獲我心矣 又曰鄭

泉字文淵性嗜酒嘗曰願得美酒滿五斛船以四時肥
甘置兩頭反覆以飲之 增又曰孫濟嗜酒不治產業

常醉屢欠酒緡人皆笑之濟恬然自若謂人曰尋常行
坐處欠人酒債欲貸此緡袍償之 又曰孫權於武昌

郡臨釣臺飲酒大醉令人以水灑羣臣曰今日酣飲醉
墮臺中乃當止耳張昭正色對曰昔紂為糟丘酒池長
夜之飲當時亦不以為惡權默然有慙色 又曰孫權

嘗命諸葛恪行酒至張昭前昭先有酒色不肯飲曰此非養老之禮也權曰卿其能令張公辭屈乃當飲之耳恪難昭曰昔師尚父九十擁旌旗仗鉞猶未告老也今軍旅之事將軍在後酒食之事將軍在先何謂不養老也昭卒無辭遂為盡爵 又曰曹公出濡須甘寧為前部督受勅斫敵前營權特賜美酒衆肴寧乃持賜手下百餘人食之畢寧先以銀盃酌酒自飲兩盃乃酌與其部督時不肯持寧以弓置膝上呵謂之曰卿見禮於至

尊孰與甘寧寧尚不惜死卿何以獨惜死部督見寧厲
即起拜持酒以通酌兵各一兩盃至二更時銜枚出斫
敵敵驚動遂退寧益貴重 世說曰阮公鄰家婦有美
色當壚酤酒阮與王安豐常從婦飲酒既醉便眠婦側
夫疑之伺察終無他意 原干寶晉紀曰杜預作河橋
成武帝幸橋譙舉觴勸預曰非卿此功不能就預曰自
非陛下之聖明則臣無所施其愚巧也 晉中興書曰
畢卓字茂世為吏部郎嘗謂人曰右手執酒杯左手執

蟹螯拍浮酒池中便足了一生 又曰山濤字巨源飲

酒至八斗方醉帝欲試之乃以八斗飲濤密益其酒濤

至本量而止 又曰胡毋輔之等共飲酒散髮裸裎閉

戶不接外客 鄧粲晉紀曰劉伶縱酒放蕩或脫衣裸

形在屋中人見譏之伶曰吾以天地為宅舍以屋宇為

禪衣諸君自不當入吾禪中又何惡乎 語林曰劉伶

字伯倫飲酒一石至醒復飲五斗渴甚求酒於妻其妻

責之捐酒棄器諫曰非養生之道宜斷之伶曰善當祝

鬼神自誓耳卿可致酒五斗吾當斷之妻如其言伶呪

曰天生劉伶以酒為名一飲一石五斗解醒婦人之言

慎莫可聽於是乃飲其酒御其肉塊然復醉世語曰

白子高少好隱淪之術嘗為美酒給道客一旦有四仙

人齋藥集其舍求酒子高知非凡乃欲取他藥雜之仙

人云我亦有仙藥於是賓主各出其藥仙人謂子高曰

卿藥陳久可服吾藥子高服之因隨仙人飛去子高仙

酒至今稱之增拾遺記曰晉有羌人姚馥充殿園每

醉中嘗曰九河之水不足以漬麴蘖八藪之木不足以為蒸薪七澤之麋不足以充庖俎但言渴於酒羣輩呼為渴羌後武帝授以朝歌帝曰朝歌帝之舊都地有酒池故使老羌不復呼渴固辭遷酒泉太守地有清池其味若酒馥乘醉拜受焉 世說曰阮宣子常步行以百錢挂杖頭至店便獨醉酣暢雖當世貴盛不可詣也

又曰周顛字伯仁風德雅重深遠危亂還江東積年恒大飲酒嘗經三日不醒人謂之三日僕射 世語曰諸

阮皆能飲酒常與宗人共集不復用常杯以大甕盛酒
圍坐相向大酌 又曰王孝伯曰名士不須竒才但使
常得無事飲酒讀離騷便可稱名士 世說曰劉公榮
與人飲酒雜穢非類人或譏之答曰勝公榮者不可不
與飲不如公榮者亦不可不與飲是公榮輩者又不可
不與飲故終日共飲而醉 晉書曰阮孚為散騎常侍
以金貂換酒為有司所彈 又曰光逸字孟祖遇亂避
難渡江依胡母輔之初至屬輔之與謝鯤阮放畢卓羊

曼桓彝阮孚散髮裸衣閉室酣飲以累日逸將排戶入
守者不聽逸便於戶外脫衣露頂於狗竇中窺之而大
叫輔之驚曰必我孟祖也遽呼入遂與飲不舍晝夜人
謂之八達 洛陽記曰劉白墮善釀酒飲者醉不能醒
因以白墮名酒又曰鶴觴永熙中青州刺史毛鴻賓齎
白墮酒之番逢盜劫酒飲之皆醉被擒因名擒姦酒諺
曰不怕張弓拔刀只畏白墮春醪 時鏡新書曰晉海
西令董勛云正旦飲酒先飲小者何也勛曰俗以小者

得歲故先賀之老者失時姑後 抱朴子曰鄭君酒釀

成因以附子甘草屑內酒中暴令乾如雞子大一丸投

一斗水立成美酒 晉書曰謝奕安兄也少與桓溫善

為溫司馬每因酒無復朝廷禮嘗逼桓溫酒溫走入南

康主門避之奕遂攜酒就廳事引溫一兵帥共飲曰失

一老兵得一老兵亦何所恨 又曰陸納字祖言為吳

興太守未至郡先至姑孰辭桓溫因問溫曰公致醉可

飲幾酒食肉多少溫曰年大來飲三升便醉白肉不過

十鬻卿復云何曰素不能飲止可二升肉亦不足言後
伺溫閑曰外有微禮方守遠郡欲與公一醉以展下情
溫欣然納之時王坦之刁彝在座及受禮惟酒一斗鹿
肉一柶座客驚愕納徐曰明公近云飲酒三升納止可
二升今有一斗以備杯酌餘漉溫及賓客並歎其率素
溫更勅中廚設精饌酣飲極歡而罷 又曰何充能飲
酒雅為劉恢所貴恢每云見次道飲令人欲傾家釀言
其能溫克也 又曰孟嘉為桓溫叅軍嘉好酣飲愈多

不亂溫問嘉酒有何好而卿嗜之嘉曰未得此中趣耳
廬山記曰陶淵明所居栗里兩山間有大石仰視懸
瀑可坐十人嘗醉眠其上名醉石 元袁桷澄懷錄曰
淵明得太守送酒多以春秫水雜投之曰少延清歡

異苑曰有虹食薛願釜中水盡願輦酒飲之虹吐金滿
釜因致豐富也 宋書曰顏延之在潯陽與陶潛情款
後為始安郡經過潛每往必酣飲致醉延之臨去留二
萬錢與潛潛悉送酒家稍就取酒嘗九月九日無酒出

宅邊菊叢中坐久之逢王弘送酒至即便就酌醉而後
歸潛不解音聲而援素琴一張每有酒適輒撫弄以寄
其意貴賤造者有酒輒設若先醉便語我醉欲眠卿可
去其真率如此郡將候潛逢其酒熟取頭上葛巾漉酒
畢還復著之 又曰顧憲之為建康令清儉強力為政
甚得人和其都下飲酒者醇旨輒號為顧建康謂其清
美焉 又曰孔覲為江夏內史性使酒每醉輒彌日不
醒居常貧罄無有豐約未嘗關懷為府長史典籤諮事

不呼前不敢前不令去不敢去雖醉居多而明曉政事
醒時判決未嘗有壅衆咸云孔公一月二十九日醉勝
世人二十九日醒也 又曰沈文季出為吳太守文季
飲酒至五斗妻王氏飲酒亦至三斗常對飲竟日而視
事不廢 又曰袁粲為丹陽尹常步屨白楊郊野間道
遇一士大夫便呼與飲酣明日此人謂被知顧到門求
進粲曰昨飲酒無偶聊相要耳竟不與相見 又曰王
忱泰外弟也忱嗜酒醉輒累旬泰謂忱曰酒雖會性亦

所以傷生游處以來常欲相戒當卿沈湎措言莫由及

今之遇又無假陳說忱嗟久之曰見規者衆矣未有若

此者也 齊書云謝幾卿性通脫為尚書左丞嘗預樂

苑宴不得醉而還詣道邊酒壚停車褰幔與車前三騶

對飲觀者如堵幾卿自若 又曰謝朓為吳興郡與弟

淪於征虜渚送別朓指淪曰此中惟宜飲酒淪建武之

朝專以長酣為事與劉填沈昭略交歡飲各至數斗朓

既至郡致淪數斛酒遣曰力飲此物勿豫人事淪嘗與

劉悛飲推辭久之悛曰謝莊兒不可云不能飲淪曰苟得其人自可沈湎十日悛甚慙無言 梁書曰梁武帝

招延後進二十餘人置酒賦詩臧盾以詩不成罰酒一斗飲盡顏色不變言笑自若蕭介染翰便成文無加點帝兩美之曰臧盾之飲蕭介之文席之美也 又曰陰鏗嘗與賓友飲宴見行觴者因迴酒炙而授之衆坐皆笑鏗曰吾儕終日酣飲而執爵者不知其味非人情也及侯景之亂鏗嘗為賊擒或救之獲免鏗問之乃前所

行觴者 又曰王瞻為吏部尚書性嗜酒每飲或彌日

而精神愈固不廢薄領武帝每稱瞻有三術射棊酒也

又曰謝善勲飲酒至數升醉後輒張眼大罵後雖貴

賤親疎無所擇也時謂之謝方眼 水經注曰劉白墮

宿擅工釀採河流醞成芳酎懸食同枯枝之年排於

桑落之辰故酒得其名矣然香醕之色清白若滃漿焉

別調氤氳不與他同蘭薰麝越自成香逸自王公庶友

牽拂相招者每云索郎有顧思同旅語索郎反語為桑

落也更為籍徵之雋句中書之英談 後魏書曰夏侯

史與南人辛諶庾遵江文遙等終日遊聚酣飲之際仍
相謂曰人生倏促何殊朝露坐上相看先後間耳脫有
先亡者於良辰美景靈前飲宴儻或有之庶共歆饗及
史亡後三月上巳諸人相率至史靈前仍共酌飲時日
晚天陰室中微闇咸見史在坐衣服形容不異平昔時
執杯酒似若獻酬但無語耳 又曰李元忠拜南趙郡
太守好酒無政績及齊神武東出元忠便乘露車載濁

酒奉迎神武聞其酒客未即見之元忠下車獨坐酌酒
擘脯食之謂門者曰本言公招延豪傑今聞國士到門
不能吐哺輟洗其人可知還吾刺勿復通也門者以告
神武遽見之又曰李元忠徵拜侍中雖處要任初不
以物務干懷惟以聲酒自娛大率常醉家事大小了不
關心園庭羅種果藥親朋尋詣必留連玩賞每挾彈攜
壺遨遊里閭每言寧無食不可使我無酒阮步兵吾師
也孔少府豈欺我哉後自中書令復求為太常以其有

音樂而多美酒故神武欲用為僕射文襄言其放達不可任以臺閣其子揆聞之請節酒元忠曰我言為僕射不勝飲酒樂爾愛僕射時宜勿飲酒 又曰太宗引崔浩論事語至中夜太宗大悅賜浩縹醪酒十斛水精戎鹽一兩曰朕味卿言若鹽酒故與卿同其味也 又曰胡叟少孤每言及父母則淚下若孺子之號春秋嘗祭之前則先求旨酒時燉煌汜潛家善釀酒每節送一壺與叟論者以潛為君子 又曰劉藻字彥先父宗之廬

江太守涉獵羣籍美談笑善與人交飲酒一石不亂藻
為東道別將辭於洛水之南文帝曰與卿石頭相見藻
對曰臣雖才非古人度亦不留賊虜而遺陛下輒當醜
曲阿之酒以待百官帝大笑曰今未至曲阿且以河東
數石賜卿 又曰齊郡王簡性好酒不能理公私之事
妻常氏燕郡公喜女也文明太后以賜簡幹綜家事頗
節簡酒乃至盜竊求乞婢侍卒不能禁 又曰阮孚性
機辨好酒貌短而禿周文帝偏所眷顧常於室內置酒

十餘餅餅上皆加帽欲戲字適入室見即驚喜曰吾兄弟輩甚無禮何為竊入王家匡坐相對宜蚤還宅也因持酒歸周文撫手大笑 北齊書曰河南王孝瑜武成禮遇特隆帝在晉陽手勅之曰吾飲汾清二盃勸汝鄴酌兩盃其親愛若此也 又曰王紘字師羅領左右都督文宣與左右飲酒曰快哉大樂紘曰亦有大若帝曰何若紘曰長夜荒飲不恤國政是謂大若帝默然 又曰高季式豪華好酒又恃舉家勲功不拘檢節與光州

刺史李元忠生平遊欵在濟州夜飲憶元忠開城門令

左右乘驛馬持一壺酒往光州勸元忠朝廷知而容之

又曰周文帝聞韋夔養高不仕辟之不能屈明帝即

位禮敬逾重乃為詩貽之夔答詩願時朝謁帝大悅勅

有司日給河東酒一斗號之曰逍遙公 又曰黃門郎

司馬消難左僕射子如之子高祖之壻勢盛當時因退

食暇尋高季式與之酣飲留宿旦日重門並閉關鑰不

通消難固請云我是黃門郎天子侍臣豈有不參朝之

理且一宿不歸家君必當大怪今若又留我狂飲我得
罪無辭恐君亦不免譴責季式曰君自稱黃門郎又言
畏家君怪欲以地勢脅我耶高季式死自有處初不畏
此消難拜謝請出終不見許酒至不肯飲季式云我留
君盡興君是何人不為我飲命左右索車輪括消難頸
又索一輪自括頸命酒引滿相勸消難不得已欣笑而
從之方乃俱脫車輪更留一宿是時失消難兩宿莫知
所在內外驚異及消難出方具言之世宗在京輔政白

魏帝賜消難美酒數石珍羞十舉並令朝士與季式親狎者就季式讌集其被優遇如此 雲仙散錄曰唐傅奕病未嘗問醫忽酣卧蹶然曰吾死矣乎即自誌曰傅奕青山白雲人也以醉死嗚呼 會容論略曰杜康善造酒以酉日死故酉日不飲酒焦革善釀革死王績追述其法以為經又采儀狄杜康以來善造酒者為譜 醉仙圖記曰有府史焦革家善醞酒冠絕當時為酒譜一卷李淳風見而悅之 李泌請里閭釀宜春酒以祭

勾芒神祈豐年帝悅乃著令 雞跖集曰張易之與李

迴同飲以鴛鴦盞一雙共飲取其常相逐 開元傳信

記曰葉法善有道術一日與朝士會忽一人扣門稱麴

生秀才突入坐內言語不凡葉疑其非人潛以飛劍擊

之應手墮地乃一酒榼中有美醞飲之同坐曰麴生風

味不可忘也 河東記曰汝陽王璵家有酒法名甘露

經飲葉靜能靜能曰有一生徒能飲當令來謁翌日有

通謁者曰進士常持滿見之侏儒也談胚脾之道飲以

酒五斗醉倒乃是一甕 醉仙圖記曰汝陽王璿取雲

夢石甕泛春渠以置酒作金銀龜魚浮沈其中為酌酒

具自稱釀王兼麴部尚書 唐書曰王績待詔門下省

官給酒日三升或問待詔何樂答曰良醞可戀耳侍中

陳叔達聞之日給一斗時稱斗酒學士 又曰李適之

雅好賓友飲酒一斗不亂夜則宴賞晝決公務廷無留

事 又曰元和間酌酒謂之注子後仇士良惡其名同

鄭注乃去其柄安系名曰偏提 又曰蒲萄酒西域有

之前代時有貢獻及破高昌收馬乳蒲萄實於苑中種

之並得其酒法 史緯錄曰唐玄宗置麴清潭砌以銀

甌泥以石粉貯三辰酒一萬車賜當制學士 萬花谷

曰裴鈞大宴有裴弘泰後至飲坐上小爵及觥船皆竭

隨即寘器於懷有銀海受一斗一飲而盡踏其海卷抱

之索馬徑去得銀二百餘兩 酉陽雜俎曰魏賈鏘嘗

令蒼頭乘小艇於黃河中接河源水以釀酒名崑崙觴

芳味世中所絕 朝野僉載曰柳亨飲未嘗醉

有白雞
盞取其

解酒

安定郡王以黃柑釀酒

色香味三絕

蜀中有酒器名酒

魁

詩人所謂酌以大斗制象北斗有魁柄

又曰元載以鼻聞酒氣便醉

人以為可治即取針挑載鼻尖出一小蟲曰此酒魔也

聞酒即畏之是日載飲至二斗 又曰王忱嗜酒一醉

或連日不醒自號上頓時人以大飲為上頓 杜陽編

曰順宗時處士伊祈元召入宮飲龍膏酒黑如純漆飲

之令人神爽此本烏弋山離國所獻 撫言曰衛元規

酒後忤丁僕射以書謝曰自茲囚酒星於天獄焚醉日

於秦坑 又曰張旭嗜酒每大醉呼叫狂走乃下筆或

以頭濡墨而書既醒自視以為神世呼張顛 唐馮贇

雲仙雜記曰辛洞好酒而無資常攜榼登人門每家取

一盞投之號為簇酒 宋陶穀清異錄曰穆宗臨芳殿

賞櫻桃進西涼州葡萄酒帝曰飲此等覺四體融和真

太平君子也 又曰裴晉公盛冬常以魚兒酒飲客其

法用龍腦凝結刻成小魚形狀每用沸酒一盞投一魚

其中 澄懷錄曰白樂天入關劉禹錫正病酒禹錫乃

餽菊苗蓋蘆菹鮓取樂天六班茶二囊灸以醒酒 清

異錄曰雍都酒海也梁奉常和泉病於甘劉拾遺玉露
春病於辛皇甫別駕慶雲春病於醜光祿大夫致仕韋
炳取三家酒攪合澄嘗飲之遂為雍都第一名釐宮集
大成釐宮謂耀州倩榼 又曰舊聞李太白好飲玉浮
梁不知其果何物余得吳婢使釀酒因促其功答曰尚
未熟但浮梁耳試取一盞至則浮蛆酒脂也乃悟太白
所飲蓋此耳 又曰荆南節判單天粹宜城人性耽酒

日延親朋強以巨杯多致狼狽然人以其德善亦喜從之時戲語曰單家酒筵乃觥籌獄也 叩頭錄曰房壽

六月擣蓮花製碧芳酒

致虛雜錄曰郎玉嗜酒而家

赤貧遇仙女於高山中投以一珠曰此醉龍珠也諸龍含之以代酒味踰若下玉甫視珠而女忽不見矣 容退紀談曰趙子固清放不羈好飲酒醉則以酒濡髮歌古樂府自執牙以節曲 又曰陶人為器有酒經晉安人餉人以酒致書云酒一經或二經至五經者他境人

不達者聞饋五經束帶立於其門 龍城錄曰魏左相

能治酒其名有醺醪翠濤貯以大甕十年味不敗

此酒得大

宛之法中夏所未有史稱蒲

太宗嘗賜詩曰醺醪勝蘭

萄酒數十年不敗者此也

生蘭生漢武百味酒名又曰百味旨酒布蘭生芬

翠濤過玉薤

玉薤隋煬旨酒名

千日

醉不醒十年味不敗 賈氏談錄曰兵部李濤小字社

翁時李公昉為翰林學士月給內醞兵部嘗因春社寄

昉詩曰社公今日沒心情為寄治聾酒一瓶惱亂玉堂

將欲遍依稀巡到第三廳社酒號治聾酒 遇齋閒覽

曰郭肱有才學而輕脫夜出為醉人所誣太守詰問肱
笑曰張公喫酒李公醉者肱是也太守令作張公喫酒
李公醉賦肱爰筆曰事有不可測人當防未然清河文
人方肆杯盤之樂隴西公子俄遭醕酖之愆守笑而釋
之 又曰石曼卿喜豪飲與劉潛為交卿倅海陵潛訪
之劇飲中夜酒竭有醋斗餘併飲之明日酒醋俱盡每
與客痛飲露髮跣足謂之囚飲坐木杪謂之巢飲 集
仙傳曰張開光嘗與母及弟出游獨留媪守舍俄有道

士敝衣冠疥癬被體直入裸浴酒甕中媼不能拒既暮
出游歸渴甚開酒芳烈亟就甕中飲媼心惡道士不敢
白而但不飲居數日開光與母弟拔宅而去 志林曰
東坡云吾兄子明飲酒不過三蕉葉吾少時望見酒盞
而醉今亦能三蕉葉矣 龍城錄曰李肇命酒為郎官
清劉跋命酒為玉友唐子西名酒之和者曰養生主勁
者曰齊物論楊誠齋名酒之和者曰金盤露勁者椒花
雨 遼禮志曰九日賜蕃漢臣僚飲菊花酒兔肝為羶

鹿舌為醬

御定淵鑑類函卷三百九十二

欽定四庫全書薈要卷一萬一千八百四十一

子部

御定淵鑑類函卷三百九十三

食物部六

酒

酒三

原玄碧

縹清

列仙傳曰安期先生與神女會圓丘酌玄碧之香酒曹植賦曰蒼梧縹清

宜春

贊夏

吳錄曰安成宜春縣出美酒風土記曰酒則五麩贊夏麩賓顯名

琬

液

瓊蘇

拾遺記曰王母薦穆王琬液清觴岳夫人傳曰夫人設王子喬瓊蘇綠酒南

梁

市 阮厨

列仙傳曰酒客梁市上酒家客也作酒常美日得萬錢有過而逐之主人酒便酸敗下

一 詳酒

斷蒲

切桂

萬畢術云酒薄復厚漬以英蒲注
曰斷蒲漬酒中即厚 下詳酒一

簞醪

盜齊

黃石公記曰昔者良將用兵人有饋一
簞醪者使投之於河令將士迎流而飲

之夫簞醪不能味一河水三軍思為
之死非滋味及之也 下詳酒一

鄗水

程鄉吳

曰湘東有鄗水酒有名 荊州

青田

玄鬯

古今注
曰烏孫

記曰桂陽一郡程鄉有酒官

國有青田核莫知其木與實而核如六升瓢貯水俄而
成酒劉章得二核集賓可供二十人一核盡一核所盛

水已中飲旋盛旋飲不可久置久則苦核曰青田酒曰
青田酒 抱朴子曰玄鬯傾棄而不羞醕酪專灌於丘

園 鎬飲 沛酣 詩曰王在在鎬豈樂飲酒 史記曰
漢高祖過沛置酒酣乃擊筑為歌

歡伯

敗首

魚贛易林曰酒為歡伯除憂來樂遠體
頤性 陳壽益部傳曰揚子拒妻者劉

懿公女也字公璞貞烈達禮有四男二女拒亡教遵聞門動有法則長子元琮常出飲酒還舍母不見十日因諸弟謝過乃數責之曰夫飲酒有不至酒者禮也汝乃沈荒慢而無敬自倡敗首何以帥先諸弟也

舉

兕

持螯

左傳曰晉趙孟叔孫豹曹大夫入於鄭鄭伯兼厚之穆叔子皮曹大夫興拜舉兕爵曰小

國賴子知免於戾矣

下詳酒一

弗淫

有與

左傳曰酒以成禮不繼以淫毛詩曰伐

木澣澣釀酒有英注曰以筐曰醴英美也

軍法

觴政

史記曰高后立諸呂為王擅權用事

朱虛侯劉章入侍高后宴飲高后令章為酒史章曰臣將種也請以軍法行酒高后曰可酒酣諸呂有一人亡酒章追拔劍斬之乃還報曰有亡酒一人臣謹行軍法斬之劉向說苑曰魏文侯與大夫飲使公乘不仁為觴政曰若飲不盡者浮以大白

周尚

魯薄

禮記曰殷尚醴

周尚酒孔疏云殷人稍文故用醴周人轉文故用酒此皆其時之用耳莊子魯酒薄而邯鄲圍音義曰楚宣

王朝諸侯魯恭公後至而酒薄宣王怒恭公曰我周公之庸勲在王室送酒已失禮方責其薄母乃太甚遂不

辭而還宣王乃發兵與齊攻魯梁惠王常欲擊趙而畏楚楚以魯為事故梁得圍邯鄲言事相因也列

郡為池

張璠漢紀云孔融天性氣爽頗推平生之意狎侮太祖太祖制酒禁而融書啗之曰天有

酒旗之星地列酒泉之郡人有旨酒之德故堯不飲千鍾無以成其聖六韜云殷君為酒池迴船糟丘而牛

飲者三千人糜元語紂曰扶老通神春秋說題辭酒非江漢流以為池也

也所以策身扶老神仙服食經曰採南燭草煮其汁為酒碧映五色服之通神成禮喪

德則敗德下詳酒一合好荒性晏子云景公飲

發晏子見曰君病酒乎公曰然晏子曰古之飲酒也足以通氣合好而已秦子曰今人知涉川必溺而忘酒

醴之

誠帝

飲工

晉中興書曰元帝性嗜酒王導深以為誠乃命左右進觴躬引觴覆

之左傳晉侯飲酒樂膳宰屠蒯趨入請佐公使尊許之而遂酌以飲王曰女為君耳將司聰也辰在子卯謂之疾日君徹宴樂學人舍業為疾故也君之卿佐是為股肱股肱或虧何痛如之女弗聞而樂是不聰也

竹葉

蘭英

張衡七辨云玄酒白醴蒲萄竹葉枝乘七發云蘭英之酒酌以滌口

湘

東

豫北

上詳郵水注竹葉浮蟻星沸飛華萍接元石嘗其味儀氏

張協七命曰荆南烏程豫北

進其法傾壘一朝可以沉湎十日簞醪投川可使三軍告捷

金漿

玉醴

西京雜記梁人

名酒曰金漿醪傳玄七謨曰於是乃有蒼梧之九醞中山之清醇金漿玉醴雲沸淵淳甘芬潛結逸味橫生

九醞

五齊

魏武帝上九醞酒奏曰臣故縣令南陽郭芝有九醞春酒又云九醞苦難飲增

為十釀差甘易飲今謹上獻

徐幹齊都賦酒厚也

三品

九成

晉劉弘為荊州室中云齊內酒聽事酒猥酒同用麴米而優劣三品弘云投醪尚三軍同醉豈得三

其厚薄自今不得分別

陸機

百藥長

千歲藏

王莽

詔曰酒者百藥之長嘉會之好抱朴子曰黃帝酒泉法以麴米和藥成丹一斗酒內一升水藏之千歲味常

中聖人

謂從事

魏志曰徐邈字景山魏國初建為尚書郎時禁酒而邈私飲至

於沉醉校事趙達問以曹事邈曰中聖人達白太祖由是得罪後文帝幸許昌見邈問曰頗復中聖人否邈對曰昔子反斃於穀陽御叔罰於飲酒臣嗜同二子不能自懲時復中之然宿瘤以醜見傳而臣以醉見識帝大

笑曰名不虛立 世說曰桓温有主簿善別酒有輒令
先嗜好者謂之青州從事惡者謂平原督郵青州有齊

郡言至臍平原有 天水耐 巴鄉清 夏仲御別傳曰
臍縣言至臍上 爰有天水元耐

長安清醇雜以東郵碧素苾馨客望杯而乾咽杯觸口
而已傾 荆州記曰永安宮西有巴鄉村善釀酒謂之

巴鄉 厚易薄 濁更清 淮南子曰楚會諸侯魯趙皆
清 獻酒於楚王主酒吏求酒於

趙趙不與吏怒乃以趙厚易魯薄者奏之楚王以趙酒
薄遂圍邯鄲故曰魯酒薄而邯鄲圍 幽冥錄曰東萊

人性靈常作酒多 頓遜樹 青田核 南史曰南海頓
醇濁而忽更清 暹國有酒樹似

安石榴採其花汁停甕中 聚千鍾 飲一石 列子曰
數日而成酒 下詳前 子產之

兄曰公孫朝聚酒千鍾積麴成封望門百步糟漿之氣
逆於人鼻方其荒於酒也 不知政道之安危人理之悔

各室內之有無九族之親疎雖水火兵刃交於前不知也 晉書曰周顛在中朝時能飲酒一石及過江雖日

醉每稱無對偶有舊對從北來顛遇之乃欣然出酒二石共飲各大醉及顛醒使視客已腐脇而死 抱

甕釀 飛軒酌 語林曰羊琇字稚舒冬月令人抱甕釀酒 左思吳都賦曰飛輕軒而酌綠醪

方雙轡而 賦珍羞 濡首 腐腸 易有孚於飲酒濡其首 養

金貂換

玉山頽

上見酒二 嵇康 醉倒如玉山之頽

增百氏漿

諸家料

清異錄酒不可雜飲飲之雖善酒者亦醉乃飲家所深忌宛葉書生胡适冬至日延客以諸家

葦遺之酒為共席半客恐私相告戒适疑而問之一人曰其懼君家百氏漿 汝陽王璉家有酒法號甘露經

四方風俗諸家材料莫不備具

蘭生

桑落

漢武帝百味旨酒名蘭生又隋煬帝酒名曰玉

薤 下詳酒
五庚信詩

醴泉侯

建康令

唐子西陸諝傳陸諝
她城人少與壺子商

君相友善約先貴無相忘已而壺子任太常商君任主
爵都尉通顯矣而諝方青州為從事壺商上疏薦之上
從其言遣壺子持節召諝至上歡甚是日拜諝光祿
勳頃之封醴泉侯食千戶 下詳酒二宋書顧憲之

遺冠

墮幘

上詳酒二韓子云齊桓公
數頽然已醉幘墮几上以頭就穿

試山

濤

祝審琦

上詳酒二晉書山濤
太祖宴後苑祝曰酒者

宋王審琦不能飲
天之美祿可惜不

能飲之祝已謂審琦曰天必賜卿酒量試飲之乃
連飲十數爵自此朝宴必滿引歸私第即不能飲

醉

侯

惡客

杜詩死贈劉生作醉侯
酒帝亦須封我醉鄉侯

又唐詩若使劉伶為
東坡詩注唐元結

以不飲者為惡客後
人以痛飲者為惡客

南郊喫火

淶溪取水

汝南先
賢傳云

郭憲從駕南郊憲舍酒東北三喫執法奏不敬詔問何故憲對曰齊失火喫酒厭之後知齊國果失火燒數千

家 荆州記曰桂陽東界俠公山下有淶溪源官常取此水為酒

黃公開肆 卓氏

當壚

王戎為尚書令著公服過黃公壚謂後車客曰吾昔與嵇叔夜阮嗣宗酣暢於此壚自嵇阮亡以來

便為時所羈縻今視此雖近邈若山河 下詳酒二

平原十日

張翰一杯 史

昭王遺平原君書曰君幸過寡人願與君為十日之飲世說曰張翰字季鷹縱任不拘時人號為江東步兵或謂曰卿乃縱適一時獨不為身後名耶張答曰使我有身後名不如即時一杯酒 輦下黃封

關中白薄

東坡詩上樽白日瀉黃封注云輦下以黃封酒貴蓋重內醞也 初學記關中有酒

名白

不赴韓期

數辭李名

唐西南採訪使韓會字朝宗昌黎人嘗約孟浩

然借至京師欲薦諸朝浩然會故人至即與劇飲歡甚
或曰君與韓公約不當後期浩然曰業已飲酒違恤其
他卒不赴 宋仁宗朝李都尉喜延士大夫盡聲色之
樂一時館閣清流無不往赴其宴者韓魏公最年少獨
未嘗造焉李數召而公以事辭人有強之者公曰固欲
往但未有名耳公處之不失和故李亦不致怨同時諸
公亦不以

王導盡觴

景讓卒爵

晉王敦字處仲王
導字茂弘敦與導

嘗詣王愷愷使美人行酒客飲不盡輒殺之酒至敦導
所敦固不肯持美人悲懼失色而敦傲然不視導素不
能飲恐行酒者得罪遂勉強盡觴導還歎曰處仲若當
世心懷剛忍非令終也 唐李景讓事母孝好獎士類
為左丞時蔣仲嘗酌酒曰忠於國孝於家者飲此酒容
肅然景讓遂起卒爵仲曰無疑於公又後魏書齊神武
帝嘗享朝士舉觴屬別駕宋遊道曰飲高歡
手中酒者乃大丈夫卿之為人合飲此酒

務觀澆

書

劉跋作傳

宋陸游字務觀自號放翁作詩曰澆書滿飲浮蛆甕攤飯橫眠夢蝶床注云東

坡以晨飲為澆書太白以午睡為攤飯 百家詩序跋字斯立名酒為玉友仍為作傳宋曾端伯亦名酒為玉

友也 趙整作歌 高允為訓 晉孝武帝太元三年秦王

限趙整作酒歌曰地列酒泉天垂酒星杜康妙識儀狄

命書之以為酒戒 後魏書高允被勅論集 往世以酒敗德者為酒訓孝文覽而悅之

酒四

原蒼梧

張華輕薄篇曰蒼梧竹葉宜城九醞

阜莢

神仙傳云葛仙翁斬阜莢樹為杯用以盛

酒酒味 益妙

胡椒

博物志曰胡椒酒 古人於歲朝飲之

文草

揚子異物志 曰文草作酒

其味甚美士人以
金買草不言貴也

若下

吳地記云若
下出美酒

湘陰

陸機七
徵曰湘

陰有耐其色澄清秋
醪春醞酒惟九成

冬清

張華上已篇曰春醴
踰九醞冬清過十旬

凍

縹王粲七釋曰凍縹
元耐醴白腐清

玄醴

潘安仁金谷詩曰玄醴
染朱顏但慙杯行遲

白醴孫詵三公山下禊
賦云九醞白醴

淵清

成公綏七唱曰秦無清
醴先和宜醇香旗九醞

淵清

冰潔

嵇康酒賦曰重耐至清淵凝
冰潔滋液兼備芬芳激激

波泛

風土
記曰

酒則星陳郡列春醞夏
成珠連波泛瀾澈神清

淵流

邊讓章華臺賦曰蘭
有山積椒酒淵流

芳馨

曹毗杜蘭香傳曰蘭香降
張碩輒齋瓦搗酒氣芳馨

蒸秀

陸機七徵曰秋
醪春醴兼醞增

奇浮蒸吐秀
雲沸淵湧

兼清

張衡南都賦曰酒則九醞甘醴
十旬兼清醪敷徑寸浮蟻若萍

待熟

食經曰坐客酒者平旦釀食時熟坐客待酒熟故以為名

屏爵

祖台之與王荆州書曰屏

爵棄卮焚

罰金

晉書曰凡民私釀酒沽其有婚姻及疾病者聽之餘有犯罰金八兩

祈黃耆

詩曰酌以大斗以祈黃耆

介景福

陸機七徵曰介景福於眉壽

養親

老

應璩文曰酌彼春酒上得供養親老下得溫飽妻子

歆靈祇

許劉愔酒箴

吐銅

龍

西征記曰太極殿前有銅龍長二丈銅樽容四斛正旦大會羣臣龍從腹內受酒口吐之於樽內

仰景曜

曹植酒賦曰仰酒旗之景曜

貢宜城

傅玄七謨曰名酎出於咸陽甘醪貢於宜

城

出天厨

神仙傳曰王方平至蔡經家曰吾欲賜汝輦美酒此酒乃出天厨其味醇醲非俗人

所宜飲今當以水和之以賜經家人人飲一升許皆醉

甘如乳

樂府歌曰春酒甘如乳秋釀清

如華 濁如河 左思魏都賦曰清酤如濟濁 斗至千 典論

曰孝靈末百司酒酒千丈一斗常侍張讓子奉為太醫令與人飲去衣露形為樂也

斗十千

曹植詩曰歸來宴 引一斛 抱朴子云于公引滿 一斛而斷獄益明

餞

百壺

詩韓奕篇云韓侯出祖出宿于屠顯父餞之清酒百壺

限七升

吳志孫皓每饗宴無

不竟日後以 七升為限

傾三斗

管輅傾仰三斗而清辨綺燦

漢祖貫

漢書高祖

好酒及色常從王媪武負貫酒時飲醉卧武負王媪見其上嘗有怪高祖每酤留飲酒讐數倍及見怪歲竟此

兩家嘗折 券棄責

潘璋賒

吳志曰潘璋字文珪性博蕩嗜酒居貧好賒酤債家至門輒言後豪

貴當 相還

杜康造

魏武帝歌何以解憂惟有杜康

蔡邕酌

蔡邕與袁公書朝夕游談

從學宴飲酌清醴錡乾
魚欣欣焉樂在其間矣

致殷勤

曹植樂歌市肉取肥
酤酒取醇交觴接杯

以致

相娛樂

古詩人生天地間忽如遠行
客斗酒相娛樂聊厚不為薄

孔嘉

詩曰

飲酒孔嘉
維其令儀

既旨

詩曰酒既和
旨旨美也

德將

德將無醉注以
德自將無至醉

也

禮飲

以禮飲酒
獻酬有儀

視冬

禮記飲齊視冬
時注飲宜寒也

避暑

素

在河朔每至夏大飲云以避
一時之暑故號河朔飲也

侍飲

詳酒

面尊

禮曰
凡飲

惟君
面尊

養老

詳酒

序賓

以賢序賓
敬讓無忽

朋享

朋酒
斯享

巷

飲巷無
飲酒

無彛

詳酒

有行

醴酒
有行

無荒

好樂
無荒

不惑

楊秉字叔節三
不惑酒色財也

禹誠

大禹之誠曰甘酒
嗜音未或不亡

康誥

成王
封康

叔作酒誥誥
識酒之義

親約

陶侃別傳曰侃母湛氏賢明有法
侃在武昌與佐吏從容燕飲常有

飲限或勸酒可少進侃悽然良久曰昔
年少曾有酒失慈親見約故不敢踰

父戒

庾袞字叔袞父

在常戒袞以酒後每醉輒自責曰余廢先
人之戒何以訓人乃於墓前自杖三十

狂藥

晉裴楷傳

曰石崇以功臣子有才氣與楷志趣各異不與之交長
水校尉孫季舒嘗酣讌慢傲過度欲表免之楷聞之謂
崇曰足下飲人狂藥責人正禮不亦乖乎乃止

淫源

曹植酒賦曰
乃荒淫之源

崇飲

其敢

崇飲崇
聚也

受福

既醉而出
並受其福

蓋狂

蓋寬饒曰無多
酌我我乃酒狂

孟

趣

詳酒

羣飲

酒誥曰羣飲汝勿佚盡
執拘以歸于周予其殺

獨醒

屈原曰
衆人皆

醉我
獨醒

上尊

詳酒一白
孔六帖云

美祿

漢書曰酒者天之美祿
帝王所以頤養天下享

祀祈福扶
衰養疾

合歡

酒食者所
以合歡

宴樂

我有旨酒以宴
樂嘉賓之心

騰車

文選騰酒
車以斟酌

舉白

漢書曰引滿
舉白白酒觴

種秫

陶潛為彭
澤令縣公

田盡
種秫

挂錢

詳酒一世
說阮宣子

側弁

側弁之俄
屢舞傞傞

絕纓

平原
夜飲

燭滅客牽美人
衣美人絕其纓

縱酒

王忱字元達恃才縱酒婦父有
憐忱乘醉弔之婦父慟哭忱與

賓客連臂披髮裸身
而入繞之三匝而出

析醞

禮樂志大樂蔗漿析朝醞
注甘蔗汁為醞病酒析解

也
生疾

宋楊文忠公喜酒飲過量既登第通判濟州
日飲醇醪往往至醉是時太夫人已年高頗

憂之一日山東賈存道先生過濟文忠館之數日先生
愛文忠之賢慮其以酒廢學生疾乃為詩示文忠曰聖
君思重龍頭選慈母年高鶴髮垂君寵母恩俱未報酒
如成病悔時遲文忠矍然起謝曰是非親客不對酒終

身不
醉
罷將曹仁為關羽所圍太祖以曹植為南中郎
將征虜將軍欲遣救仁呼有所勅戒植醉

不能受命於是
上悔而罷之

飲耐月令孟春天子飲耐

賜爵禮君若賜之爵即越席而

再拜稽首受登席祭之飲卒爵而俟君
卒爵然後授虛爵注不敢先君盡之

相罰文選引滿相罰

其觥兕觥其觥注兕觥罰爵也觥然不用

飛觴舉白文選

罰爵禮有常罰之爵

酌酢禮

誅賞周禮以酒式誅賞注誅賞其作酒之善惡也

飲祀越庶國飲

惟祀乃
得飲酒
飲別詳酒一酌原飲別

設醴漢書楚元王每置酒為穆生設醴

載酌詩既載清酌

麴蘖若作酒醴爾惟麴蘖

法式周禮作酒之法也

荒

湛顛覆厥德荒湛於酒

酒淫義和酒淫廢時亂日

荒腆惟荒腆於酒

淫酗

淫醜肆虐臣
下化之紂也

公酒 周禮公事
作酒也

禮酒 賓客
之酒

佐酒 助
行

酒

使酒 季
布

酒府 酒正
之府

酒正 周禮酒正日入其成
月入其要歲終則會

注皆謂合
計其用

酒人 造酒
者

酒材 周禮授酒材掌
其厚薄之齊

酒吏

孫皓每宴會羣臣無不令沈醉置黃門侍郎十人不與
酒令侍立為司過之吏飲罷各奏其闕失隨大小加刑

酒官

秩酒

注酒正凡秩酒者以書契授之
秩常也優老臣常授酒

勞酒 孟
春

天子躬耕籍田還乃宴飲於大寢
公卿大夫諸侯皆御命曰勞酒

兼六物 詳酒一月
令孟冬

比千乘

貨殖傳一歲千
釀比千乘之家

臥甕下

畢卓為吏部比舍
郎釀酒熟畢醉後

夜至甕下盜飲掌酒者
縛之明旦乃畢吏部

嘔車中 詳酒
一

効周顛 顛頌
吏部

屢有荒醉失儀
為有司所劾

擊錢鳳

晉溫嶠偽醉以手版擊鳳

亂籩豆

亂我籩豆

倒接羅

世說云山季倫為荊州時出酣暢人為之歌曰山公時一醉逕造高陽池日暮倒載歸酩

酩無所知時復乘驄馬倒著白接羅舉手語葛強何如并州兒

朱顏酖

美人既醉朱顏酖

白刃起

失意杯酒間白刃起相酬

揖不勝

論語注下而飲謂射畢揖降以俟眾耦皆降勝

者乃揖不勝者
升取解立飲也

觥不敬

周禮觥其不敬者注觥罰爵也

受爵

禮玉藻君

子之飲酒也受一爵而色酒如也二爵而言言三爵而油油以退

實尊

周禮酒正凡祭祀以法共

五齊三酒以實八尊大祭三貳中祭載貳小祭一貳皆有酌數惟齊酒不貳皆有器量

增百品

酒三重

說文

羅浮春

東坡在惠州自造酒號羅浮春以惠州有羅浮山而得名

崑崙觴

一詳酒

醑醑

唐主謂左右曰李絳之骨醑真宰相也

葡萄酒

麩米

杜詩曰聞道雲安麩米春纔傾一盞即醺人

茅柴

宋韓駒字子蒼有茅柴酒詩三

年逐客卧江皋自與田工歷小槽飲慣茅柴諸苦硬不知如蜜有香醪蓋謂苦硬之酒如茅柴之火易過也

千日醉

詳酒二博物志

三日醑

漢文帝賜醑三日宋祥符中書降大赦改元東都

賜醑五日天下三曰蓋循漢遺事也

浮晏嬰

說苑齊景公飲酒陳桓子侍望見晏子而復于公曰

請浮晏子公曰何故也對曰晏子衣緇布之衣麋鹿之裘棧輪之車而駕駑以朝是隱君之賜也公曰諾酌者奉觴而進曰君命浮子晏子避席曰請飲而後辭乎其辭而後飲乎公曰辭然後飲晏子曰臣聞古之賢臣有受厚賜而不顧其國族則過之若夫弊車駑馬以朝主者非臣之罪也且臣以君之賜臣父之黨無不乘車者

母之黨無不足於衣食者妻之黨無凍餒者國之簡士待臣而後舉火者數百家如此為隱君之賜乎彭君之賜乎公曰善為

我浮桓子也

觴桓子

宋王禹偁文于是齊侯以晏子之觴而觴桓子

八

伯晉人任達好酒阮放為宏伯邨鑿為方伯胡母輔之為達伯卞壺為栽伯蔡謨為郎伯阮孚為延伯劉綏為委伯羊曼為黠伯號為兗州八伯八仙賀知章汝陽王璵李適之崔

杜子美有飲中八仙歌

止酒詩

陶潛止酒詩曰平生不止酒止酒情無喜暮止不能寢晨止不

能起日日欲止之營衛止不理徒知止不樂未信止利已始覺止為善今朝真止矣從此一止去將止扶桑淡

清顏止宿客

斷酒戒

原蒲萄善醉

魏文帝云蒲萄釀以為酒甘於

麴未善醉

酒藤消醒

古今草木注云酒杯藤出西域大如臂葉似葛實如梧桐香美可酌士人

投酒能消宿醒

策勲飲至

抱朴子曰一瓶之醪傾而三軍之感衆悅解毒之觴行而盜馬之屬感

消憂成禮策勲飲至降神合人非此莫以也

和憾親讐

曹植酒賦曰和暄皆之宿憾雖怨讐

其必親

應化感氣

曹植七啟曰乃有春清縹酒康狄所營應化則變感氣而成彈徵則苦發

扣宮則甘生於是盛以翠搏酌以雕觴浮蟻鼎沸酷烈馨香可以和精神可以娛腸

苞苦含辛

傅玄七謨曰白醴九成玄醞清醇泛華浮蟻苞苦含辛

賢聖斯嘗

江統酒誥曰歷代悠遠經

史彌長上自三皇下逮五帝雖曰聖賢亦咸斯嘗

通人此累

祖台之與王荆州書曰君須復

飲不廢止之將不獲已耶通人達士累於此物

春醞夏成

風土記曰酒則元端水齊春醞夏成

通神遁暑用厭飲事

秋藏冬發

見曹植酒賦

雞鳴時熟

食經曰夏雞鳴酒法

秫米二升作糜麩三升以水五升攪之封頭今日作明日雞鳴時熟

狗猛不售

韓子曰宋有酤

酒懸幟甚高斗槩甚平而酒不售問人人曰君家畜猛狗也

鄭玄三百

鄭康成別傳曰袁紹

邀飲於城東必欲玄醉時會者三百人酣酒之後人人進爵玄飲至三百盃秀若明目容儀溫偉

周

文百觚

傅玄酒賦曰唐堯千鍾周文百觚

公榮共醉

詳酒二

孔羣好

飲世說曰鴻臚孔羣好飲酒王藻曰卿服腐腸之藥耽爽口之味不見酒家覆甌布久則糜爛羣曰公不見

糟中肉乃更堪久羣嘗與親舊書曰今年田得七百石秫米不了麩藥事

不用常杯

詳酒二

不如一杯

詳前世說

管仲棄半

管子云齊桓公飲管仲酒詳酒二

于

公益明

抱朴子曰于公定國飲滿一石而斷獄益明

賜晉秬鬯

晉文公獻楚俘於周

王賜之鉅鬯

一卣卣也

錫魏鉅鬯冊魏公九錫文曰是用錫君鉅鬯一卣

九獻

禮畢

傳曰楚子入享於鄭九獻注上公之禮九獻而禮畢也

三行遂出

管子曰桓公與

管仲飲掘新井而柴焉十日齋戒召管仲仲至公執爵夫人執尊觴三行仲趨出公怒曰寡人齋戒以飲仲父

以為脫於罪矣仲曰臣聞湛於樂者洽於憂厚於味者薄於行是以走出拜而送之

逸逸有序

詩曰舉酬逸注有序貌

油油以退

見前

五斗解醒

詳酒二語林曰劉伶

一石亦醉

淳于髡詳酒二

不能滿觴

田蚡辭不能滿觴灌夫怒

有服敢

辭

灌夫字仲孺有服過田蚡蚡曰吾欲與仲孺過魏其侯會仲孺有服夫曰將軍幸許過魏其侯夫安敢以

服為

不醉反恥

詩曰彼醉不臧不醉反恥

不醉無歸

詩厭厭夜飲不醉無

歸

頌皆有法

周禮酒正掌酒之賜頌皆有法以行注法尊卑之差

賜不再拜

禮酒肉之賜不再拜

乘馬携壺

劉伶嘗乘鹿車攜一壺酒使人荷鍾隨身曰死便埋我其遺形

此如衝杯漱醪

詳酒五劉伶酒德頌

不知其秩

是曰既醉不知其秩

不

知其尤

是曰既醉不知其尤

未卜其夜

詳酒二左傳曰桓公樂飲

樂飲今

夕湛露之觴

瑤池之宴

周穆王宴西王母

迨我暇矣

詩

酌言酬之

詩

酌皆有數

禮

樂且有儀

既旨既

清且多且有

逮下之恩

侍宴之禮

臣侍宴過三爵非禮

增鈞詩鈞

掃愁帚

東坡洞庭春色詩應呼鈞詩鈞亦號掃愁帚須君漱澆我談天

鴨綠鵝黃

東坡詩小舟浮鴨綠大杓瀉鵝黃蓋用杜詩鵝兒黃似酒對酒愛新鵝之句

猪紅熊白

宋楊廷秀酒歌生酒清於雪煮酒赤如血煮酒只帶烟火氣生酒不離泉石味石根

泉眼新汲將麴米釀出春風香坐上猪紅問熊白甕頭鳴綠變驚黃先生一醉萬事已那知身在塵埃裏

梁甘劉辛

清異錄

趙厚魯薄

詳酒一淮南子云楚會諸侯

宜城九

釀宜城九釀號竹葉酒

洞庭三絕

安定郡王以黃柑釀酒名曰洞庭春色其酒色香味三絕

東坡有詩與賦按唐人名酒以春如土窟春石凍春松醪春竹葉春梨花春羅浮春甕頭春麴米春拋青春是也

騎馬傾歌

昔阮咸醉騎馬傾歌人皆指而笑曰個老子騎馬如乘船行波浪中杜甫詩曰

知章騎馬似乘船本此

爭妓慚悔

清異錄閩士劉乙嘗乘醉與人爭妓女既醒慚悔乃集書

籍中凡飲酒致失賈禍者編以自警
題曰百悔經自後不飲至於終身

行酒進醢唐李景略

嘗宴僚佐行酒者誤以醢進判官京兆任
廸簡以景略性嚴恐行酒者獲罪強飲之

餉酒知水

晉孔巖祖父奕為全椒令明察過人時有遺其酒者始
入門奕遙呵曰人餉吾兩甕酒其一何故非也檢視之

果是水或問何以知之曰酒重水
輕提酒者手有輕重之異故耳

以酒杜人石林詩話晉人

多言飲酒有至沉醉者其意未必真在於酒蓋時方艱
難人各懼禍惟托於醉可以疎遠世故陳平曹參以來

俱用此策漢書記陳平於劉項未判之際日飲醇酒戲
婦人是宜真好飲耶曹參雖於此異然方欲解秦煩苛

付之清淨以酒
杜人是亦一術

乘酒挑妾

晉紀瞻為尚書置酒請王導觀妓瞻愛妾能歌新聲

左僕射護軍周顛乘酒於眾中挑之而不得
有司劾顛荒酒失儀至元帝時乃詔宥焉

飲如淋

灰東坡詩趙子飲酒如淋灰一年十萬飲如吸川中飲

八仙歌左相日興費萬錢飲如勸酒至顛宋徽宗時

長鯨吸百川銜杯樂聖稱避賢禁中上頻以巨觥勸之攸懇辭不任杯酌將至據鞍

顛踏上曰就令灌死亦不至失一司馬光也索取宋顏延之好騎馬遨遊里巷過舊知輒據鞍索酒

得酒必盡傾意氣自若嘗以醉謁何尚之尚之謂左右曰此人醉甚可畏無暑無寒清異

陽釋法常酷嗜酒無寒暑風雨常醉醉則熟寢覺即朗

吟嘗謂同志曰酒天虛無酒地綿邈酒國安恬無君臣貴賤之拘無財利之圖無刑罰之避飲酒百盞東坡

陶陶馬蕩蕩馬其樂不可得而量也飲酒說歐公盛年能飲百盞然常為張安道所困梅聖俞亦

能飲百許盞然醉即高义手而語彌温謹此亦知所不

足而勉之非善飲者也

送酒六壺

東坡云章質夫送酒六壺書至而酒不達吏跌而忘之戲

作小詩問之曰白衣送酒舞淵明急掃風軒洗破觥豈意青州六從事化為烏有一先生空煩左手持新蟬漫

遠東蘿喚落英南海使君今北海定分百榷餉春耕

原學士十二人

漢制學士十二人給

大官桐馬酒注以馬乳為酒採桐葉時乃成臣瓚曰按武帝以馬家為桐馬似不為酒也

女酒三

十人

周禮注女奴曉酒也

擬酒旗於玄象

張載酒賦

推酒泉之嘉

名

傅玄酒賦

陳魯匡之謀

收榮公之利

將成禮以合

歡 豈納邪而伐德

雖取陶陶之樂

劉伶酒德頌

無愆

抑抑之儀

其未醉止威儀抑抑

資酒食以合歡初筵有禮用

歌舞以飾喜終宴不疲

酒五

原詩宋陶潛飲酒詩曰有客常同止趣舍邈異境一士
長獨醉一夫終年醒醒醉還相笑發言各不領規規一
何愚兀傲差若穎寄言酣中客日沒燭當秉 周庾信

報趙王賜酒詩曰梁王修竹園冠蓋風塵喧行人忽枉
道直進桃花源稚子還羞出驚妻倒閉門始聞傳上命
定是賜中樽野爐燃樹葉山杯捧竹根風池還更暖寒

谷遂長暄未知稻梁雁何時能報恩 又正旦蒙趙王

賚酒詩曰正旦辟惡酒新年長命杯栢葉隨銘至椒花
逐頌來流星向椀落浮蟻對春開成都已救火蜀使何
時迴 又中山公許乞酒一車未送詩曰細柳望蒲臺

長河始一迴秋桑幾迴落春蟻未曾開瑩角非難馭椎
輪稍可催只言千日飲舊逐中山來 又就蒲州刺史

乞酒詩曰蕭瑟風聲慘蒼茫雲貌愁鳥寒棲不定池凝
聚未流蒲城桑葉落灞岸菊花秋願持河朔飲分勸東

陵侯 又答王褒餉酒詩曰今日小園中桃花數樹紅

開君一壺酒細酌對春風未能扶畢卓猶足舞王戎仙

人一捧露判不及杯中 增唐張說奉蕭令嵩宇文黃

門融裴中書光庭酒三絕句樂奏天恩滿杯來秋興高

更蒙蕭相國對席飲醇醪 聖德重甘露天章下大風

又乘黃閣賞願作黑頭公 西掖恩華降南宮命席闌

詎知雞樹後更接鳳池歡 李白待酒不至玉壺繫青

絲沽酒來何遲山花向我笑正好啣杯時晚酌東窻下

流鶯復在茲春風與醉客今日且相宜 又月下獨酌
詩曰花間一壺酒獨酌無相親舉杯邀月影對影成三
人月旣不解飲影徒隨我身暫伴月將影行樂須及春
我歌月徘徊我舞影凌亂醒時同交歡醉後各分散永
結無情游相期邈雲漢 杜甫謝嚴中丞送青城山道
士乳酒一餅詩曰山餅乳酒下青雲氣味濃香幸見分
鳴鞭走送憐漁父洗盞開嘗對馬軍 張謂湖中對酒
作夜坐不厭湖上月晝行不厭湖上山眼前一樽又長

滿心中萬事如等閒主人有黍萬餘石濁醪數斗應不
惜即今相對不盡歡別後相思復何益茱萸灣頭歸路
賒願君且宿黃公家風光若此人不醉參差辜負東園
花 白居易勸酒詩曰勸君一杯君莫辭勸君兩杯君
莫疑勸君三杯君始知面上今日老昨日心中醉時勝
醒時天地迢迢自長久白兔赤烏相趁走身後堆金挂
北斗不如生前一杯酒 又賦得何處難忘酒詩曰何
處難忘酒朱門美少年春分花發後寒食月明前小院

迴羅綺深房理管絃此時無一盞爭過豔陽天 李敬

中勸酒詩曰不向花中醉花應解笑人只憂連夜雨又
過一年春日日無窮事區區有限身若非杯酒裏何以

寄天真 陸龜蒙和襲美醉中以一壺見寄曰酒痕衣

上襟莓苔猶憶紅螺一兩杯正被遶籬荒菊笑日斜還
有白衣來 皮日休友人許惠酒以詩徵之野老蕭然

訪我家霜殘白菊兩三花子山病起無餘事只望蒲臺

酒一車 宋蘇轍以蜜酒送柳真公牀頭釀酒一年餘

氣味全非卓氏壚送與幽人試嘗看不應只是百花鬚

又家釀詩曰方暑儲麩蘖及秋舂秣稻甘泉汲桐柏
火候問隣媪唧唧鳴甕盎暎暎化梨棗一撥欣已熟急
搗嫌不早病色變渥丹羸軀驚醉倒子雲多交遊好事
時相造嗣宗尚出仕兵厨可常到嗟我老杜門奈此平
生好未出禁酒國耻為甕間盜一醉汁滓空入腹誰復
告 又釀重陽酒詩曰風前隔年麩甕裡重陽酒適從
臺無餽飲啜不濡口秋嘗日已迫收拾煩主婦仰空露

成霜蹇庭菊將秀金微火猶壯未可多覆部唧唧候鳴
聲涓涓夜初溜輕巾漉糟脚寒泉養罌缶誰來共佳節
但約隣人父生理正艱難一醉陶衰朽他年或豐餘此
味恐無有 韓駒還朝飲酒絕句曰往時看曝石渠書

內酒均頒白玉腴落魄十年無復醉因公今日識官壺
程致道謝江仲舉惠酒詩曰山城無物可忘憂但有
平原病督郵知我囊中無白水煩君若下出青州芳甘
未謝三年醞傲兀能消萬古愁會待東郊春意動鳴鞭

乘興草堂遊

范石湖寓直玉堂拜賜御酒詩曰歸鴉

陸續墮宮槐簾幙參差晚不開小雨遂將秋色至長風

時送市聲來近瞻北斗璿璣次猶夢西山翠碧堆慚愧

君恩來甲夜殿頭宣勸紫金杯 陸游飲石洞酒戲作

酣酣霞暈力通神淡淡鵝雛色可人一笑破除垂老日

滿懷搖蕩隔年春梅花的吹初破楊柳纖纖染未勻

醉倒橋邊人不怪西曹免護相君苗 又對酒絕句温

如春色爽如秋一檣燈前自獻酬百萬愁魔降未得故

應用爾作戈矛 徐文瀾詠酒詩曰才傾一盞碧澄澄

自是山妻手法成不遣水多防味薄要令麩少得香清

涼從荷葉風邊起暖向梅花月裡生世味摠無如此味

深知此味即淵明 元劉因黑馬酒詩曰仙酪誰誇有

太元漢家捫馬亦空傳香來乳面人如醉力盡皮囊味

始全千尺銀駝開曉宴一杯瑤露洒秋天山中喚起陶

弘景轟飲高歌勅勒川 許有壬咏上京馬酒詩曰味

似融甘露香疑釀醴泉新醅撞重白絕品挹清玄驥子

饑無乳將軍醉卧擅桐官聞漢吏鯨吸有今年 又秋
露白酒熟卧聞糟聲喜而得句治麩辛勤夏竟秋竒功
今日遂全收日華煎露成真液泉脉穿巖咽細流不忍
撥醅斟甕面且教留響在牀頭老懷磊磊行澆盡三徑
黃花兩玉舟 周權蒲萄酒詩曰翠虬夭矯飛不去領
下明珠脫寒露累累千斛晝夜春列甕滿浸秋泉紅數
宵醞月清光轉穠腴芳髓蒸露暖酒成快瀉宮壺香春
風吹凍玻璃光甘逾瑞露濃欺乳麩生風味難通譜縱

教典却鷓鴣裘不將一斗博涼州
楊維楨紅酒歌揚

子渴如馬文園宰官特賜桃花源
桃花源頭釀春酒滴
滴真珠紅欲然左官忽落東海邊
渴心鹽井生炎烟相
呼西子湖上船蓮花博士飲中仙
如銀酒色未為貴令
人長憶桃花泉膠州判官玉牒賢
憶昔同醉瑤林筵別
來南北不通問夜夢玉樹春風前
朝來五馬過陋廛贈
以同袍五色彩副以五鳳樓頭牋
何以澆我磊落抑塞
之感慨桃花美酒斗十千垂虹橋
下水拍天虹光散作

真珠涎吳娃鬪色櫻在口不放白雪盈人顛我有文園
渴苦無奏曲鴛鴦絃預恐沙頭雙玉盡力醉未與長瓶
眠徑當垂虹去鯨量吸百川我歌君扣舷一斗不惜詩
百篇 明邵寶雪酒詩為孫司徒賦曰元酒曾聞侑大

烹釀來寒雪品尤清也知承露能高致須信藏冰為曲
成光重夜杯如有物暖銷春甕本無聲相看莫謂人間
味一滴先天萬古情 王鏊酒熟志喜常年送酒媿諸
隣斗覺今年富十分水法特教擔柳毅麩材先已謝桐

君牀頭夜滴晴塔雨甕面香浮暖閣雲莫笑陶公巾自
漉年來正策醉鄉勲 李濂弟洛以襄陵酒方見示如
法釀造良佳賦此答意襄陵自昔稱名酒猗氏於今得
秘方傳示故園知汝意釀成新味與誰嘗金盤滴露冷
冷白玉椀浮春冉冉香倚甕題詩寄吾弟西齋風雨憶
聯牀

原引梁朱异田飲引曰卜田宇兮京之陽面清洛兮背
修邛屬風林之蕭瑟值寒野之蒼茫鵬紛紛而聚散鴻

冥冥而遠翔酒沈兮俱發雲沸兮波揚豈味薄於東魯
鄙蜜甜於南湘於是客有不速朋來遠方臨清池而滌
器闢山牖而飛觴促膝兮道故久要兮不忘閒談希夷
之理或賦連翩之章

原賦漢鄒陽酒賦曰清者為酒濁者為醴清者聖明濁
者頑駘皆麴渾丘之麥釀野田之米流光醴醴甘滋泥
泥醪醴既成綠瓷既啟且筐且漚載芻載泔庶人以為
欣君子以為禮其品類則沙洛綠鄴烏程若下高公之

清關中白薄青渚縈渟凝醴醇酎千日一醒揚雄酒
箴曰子猶瓶矣觀瓶之居居井之眉處高臨深動常近
危酒醪不入口藏冰滿懷不得左右牽於纏徽自用如
此不如鴟夷鴟夷滑稽腹大如壺盡日盛酒人復借酤
常為國器託於屬車出入兩宮經營公家由是言之酒
何過乎魏曹植酒賦曰余覽揚雄酒箴辭甚瑰瑋頗
戲而不雅聊作酒賦粗究其終始嘉儀氏之造思亮茲
美之獨珍仰酒旗之景曜協嘉號於天辰穆生以醴而

辭楚侯嬴感爵而輕身其味有宜城醪醴蒼梧醪清或
秋藏冬發或春醞夏成或雲沸川涌或素蟻浮萍爾乃
王孫公子俠遊翱翔將承芬以接意會陵雲之朱堂獻
酬交錯宴笑無方於是飲者並醉從橫謹謹或揚袂屢
舞或扣劍清歌或嘖蹴辭觴或奮爵橫飛或歌驪駒既
駕或稱朝露未晞於斯時也質者或文剛者或仁卑者
忘賤窶者忘貧於是矯俗先生聞之而嘆曰噫夫言何
容易此乃淫荒之源非作者之事若耽於觴酌流情縱

佚先王所禁君子所斥 魏王粲酒賦曰帝女儀狄旨
酒是獻苾芬享祀人神式宴辨其五齊節其三事醜沈
盜泛清濁各異章文德於廟堂協武義於三軍致子弟
之孝養糾骨肉之睦親成朋友之歡好贊交往之主賓
既無禮而不入又何事而不因賊功業而敗事毀名行
以取誣遺大耻於載籍滿簡帛而見書孰不飲而懼茲
罔非酒而惟辜在昔公旦極茲話言濡首屢舞談易作
難大禹所忌文王是艱 晉張載鄼酒賦曰惟聖賢之

興作貴垂功而不泯嘉康狄之先識亦應天而順人擬
酒旗於玄象造甘醴以怡神雖賢愚而同好似大化之
齊均物無往而不變獨居舊而彌新經盛衰而無廢歷
百代而作珍若乃中山冬啟醇酎秋發長安春御樂浪
夏設縹蟻萍布芬香酷烈垂嘉稱於百代信人神之所
悅余聞珍酒出於湘東既不顯於皇都乃潛論於吳邦往
逢天地之否運今遭六合之開通播殊美於聖代宣至
味而大同匪徒用法之窮理信泉釀之所鍾故其為酒

也殊功絕倫三事旣節五齊必均造釀以秋告成以春
備味滋和體淳色清宣御神志導氣養形遺憂消患適
性順情言之者嘉其旨美味之者棄事忘榮於是糾合
同好以遨以遊嘉賓雲會矩坐四周設罍樽於南楹酌
浮觴以施流備鮮肴之綺錯進時膳之珍羞禮儀攸序
是獻是酬頰顏微發溢思凱休德音晏晏弘此徽猷咸
得志以自足願棲遲於一丘於是歡樂旣洽日薄西隅
主稱湛露賓歌驪駒僕夫整駕言旋其居乃憑軾以迴

軌騁輕駟於通衢反衡門以隱跡覽前聖之典謨感夏

禹之防微悟儀氏之見疎鑒往事而作誠罔非酒而惟

愆哀秦穆之既醉殲良人而棄賢嘉衛武之能悔著屢

舞於初筵察成敗於往古垂將來於茲篇 袁山松酒

賦曰素醪玉潤清醕淵澄織羅輕布浮蟻競升泛芳樽

以琥珀馨桂發而蘭興一歆宣百體之關一飲蕩六府

之務 增皇甫湜醉賦曰沉湎於酒有晉之七賢心遊

於夢境隨於烟六府漫漫四肢綿綿透隨津渾陶和渾

鮮遺天地之濶大失膏火之銷煎寂寂冥冥根歸復撲
居若死灰行猶飄殼車屢墮兮無傷首鎮濡兮不覺機
發而動菟交而暝合文字之醇味反騷人之獨醒曾不
知其耳目尚何懼於雷霆偶四體以合莫歸一元而太
寧麴蘖氣散竹桂滋已百慮森復七情紛始風飄火蕪
矜誇跼跂嗟害馬之驟還顧息肩兮未幾蘇門子聞而
笑之曰子之於道其醯雞歟彼至人者天地根性情虛
披拂衆萬脫遺寰區形猶大象心冥太初故大患乃失

而至道可居也乃今假荒惑之具沉耳目之機其解須
臾憂患繁滋中心不可損外患生之為疢為毒為狂為
醜負責之道陰陽戾違束乎巫醫毆乎有司辱身滅名
痿肺淫支狼狽踈蹶為大人嗤不得盡年玉色光衰曾
不如覩無醉時使人困苦如斯 陸龜蒙中酒賦曰書
編百氏病載千名將有濱於九死諒無敵於餘醒窻間
落月枕上殘更意欲問而無問夢將成而不成愛靜中
而人且語愁曙後而雞已鳴才遭輻輳適別恩情屈大

夫之獨醒應難共語阮校尉之連醉不可同行氣縷支
綿神雜色沮前歡已誓於拋擲往事空經乎思慮有馘
卓擒伶之伍我願先登有殛狄放杜之君臣能執御聿
當拔酒樹平麴封培仲榼碎堯鍾先刊美祿次削真龍
編虎鬚者寧教畔去持蟹螯者不要相逢欲倚還眠將
詞又默深窮寂寞之境別有悽涼之域黃昏細雨迷途
而不到長亭白晝繁花失意而初歸故國背枕求穩牽
幃就黑愁應平子分與渴是相如傳得感物逾嗟懷人

有惻冠纓不御杯按空陳徒殲鷺鷥之髀浸費猩猩之

唇牛心表異熊掌稱珍剪雲夢豈

音

採泮宮芹周子之

菘向晚庾郎之薤初春加以歐川桂蠹潁谷榆仁雖馳
心於萬品且忘味於茲辰或乃強迎賓友力答牋書落
魄不啻壓伊有餘檐褕猶嬾整解散固慵梳卜士蔚專
諷蝦蟆誠堪竊笑莊周子化為蝴蝶實是憑虛客曰雖
鯖鮓能珍微風可折豈比夫榴花竹葉之味鄗水之清
中山之碧必能醺骨醃顏潛消暗釋况前覆乃後車之

驚獨行為衆人之僻不然吾將受教於聖賢敢忘乎歡伯
原箴晉劉惔酒箴曰爰建上業曰康曰狄作酒於社獻
之明辟仰郊昊天俯祭后土歆禱靈祇辨定賓主啐酒
成禮則彛倫攸叙此酒之用也 增唐皮日休酒箴曰

皮子性嗜酒雖行止窮泰非酒不能適居襄陽之鹿門
山以山稅之餘繼日而釀終年荒醉自戲曰醉士居襄
陽之洞湖以舸船載醇酎一甌往來湖上遇興將酌因
自諧曰酒民於戲吾性至荒而嗜於此其亦為聖哲之

罪人也又自戲曰醉士因箴以自警箴曰酒之所樂樂其全真寧能我醉不醉於人

原讚東晉戴逵酒讚曰余與王元琳集於露立亭臨觴撫琴有味乎二物之間遂共為之讚曰醇醪之興與理不乖古人既陶至樂乃開有客乘之隗若山顏目絕羣動耳隔迅雷萬異既冥惟無有懷

原頌魏劉伶酒德頌曰有大人先生以天地為一朝萬期為須臾日月為牖戶八荒為庭衢行無轍迹居無室

廬幕天席地縱意所如止則操卮執觚動則挈榼提壺
惟酒是務焉知其餘有貴介公子搢紳處士聞吾風聲
議其所以乃奮袂攘襟怒目切齒陳說禮法是非鋒起
先生於是捧豐承槽銜杯歆醪奮鬚箕踞枕麩藉糟無
思無慮其樂陶陶兀然而醉恍爾而醒俯視萬物擾擾
焉如江漢之載浮萍二豪侍側焉如果羸之與螟蛉
原誥晉江統酒誥曰酒之所興肇自上皇或云儀狄一
曰杜康有飯不盡委餘空桑鬱積成味久蓄氣芳本出

於此不由竒方

原戒晉庾闡斷酒戒曰蓋神明智慧人之所以靈也好惡情欲人之所以生也明智運於常性好惡安於自然吾以知窮智之害性任欲之喪真也於是椎金罍碎玉椀破兕觥損觚瓚遺舉白廢引滿使巷無行搯家無停壺剖樽折杓沈炭銷鑪屏神州之竹葉絕縹醪乎華都言未及盡有一醉夫勃然作色曰蓋空桑珍味始於無情靈和陶醞竒液特生聖賢所美百代同營故醴泉涌

於上世懸象煥乎列星斷蛇者以興霸折獄者以流聲
是以達人暢而不壅抑其小節而濟大通子獨區區檢
情自封無或口閉其味而心馳其聽者乎庾生曰爾不
聞先哲之言乎人生而靜天之性也感物而動性之欲
也物之感人無窮而情之好惡無節故不見可欲使心
不亂是以惡跡止步滅影即陰形情絕於所託萬感無
累乎心心靜則樂非外唱樂足則欲無所淫惟味作戒
其道彌深賓曰唯唯敬承德音

原啟梁劉孝儀謝東宮賚酒啟曰異五齊之甘非九醞

之法屬車未曾載油囊不得酤試儔仙樹葛玄泥首才

比蒲桃孟他銜壁固知託之養性妙解怡神擬彼聖人

差得連類 又謝晉安王賜宜城酒啟曰孝儀啟奉教

垂賜宜城酒四器歲暮不聊在陰即慙惟斯二理總萃

一時少府鬪猴莫能致笑大夫落雉不足解顏忽值瓶

瀉椒芳壺開玉液漢樽莫遇殷杯未逢方平醉而遁仙

羲和耽而廢職仰憑殊塗便申私飲未矚壘恥已觀幘

岬傾耳求音不聞霆擊澄神密眠豈覲山高愈疾消憂
於斯已驗遺榮忽賤即事不欺醕酌之中猶知銘荷不
任云云

原論晉杜預酒論曰重醞醇醴沃土泉清甜苦無常五
味相并

增書梁陳暄與兄子秀書曰具見汝書與孝典陳吾飲
酒過差吾有此好五十餘年昔吳國張公亦稱耽嗜吾
見張公時伊已六十自言引滿大勝少年時吾今所進

亦勝於往日老而彌篤惟吾與張季舒耳吾方與此子
交歡於地下汝欲夭吾此志耶昔阮咸阮籍同遊竹林
宣子不聞斯言王湛能玄言巧騎武子呼為痴叔何陳
留之風不嗣太原之氣巋然翻成可怪吾既寂寥當時
朽病殘年產不異於顏原名未動於卿相若不日飲醇
酒復欲安歸汝以飲酒為非吾以不飲為過昔周伯仁
渡江惟三日醒吾不以為少鄭康成一日三百盃吾不
以為多然洪醉之後有得有失成廝養之志是其得也

使次公之狂是其失也吾嘗譬酒猶水也可以濟舟亦
可以覆舟故江諮議有言酒猶兵也兵可千日而不用
不可一日而不備酒可千日而不飲不可一飲而不醉
美哉江公可與同論酒矣汝驚吾墮車侍中之門陷池
武陵之第遍而朝野自言憔悴丘也幸苟有過人必知
之吾平生所願身沒之後題吾墓云陳故酒徒陳君之
神道若斯志意豈避南征之不復賈誼之慟哭者哉何
水曹眼不識盃鐺吾口不離瓢杓汝寧與何同日醒與

吾同日而醉乎政言其醒可及其醉不可及也速營糟
丘吾將老焉

御定淵鑑類函卷三百九十三

謹案卷三百九十二第十六頁後四行何謂不養老也刊本謂訛為養老訛飲酒據三國志改

第二十六頁後四行乃為詩貽之夏答詩願時朝謁帝大悅刊本脫貽之夏答詩五字又大訛不據周書增改

卷三百九十三第十一頁前五頁行鱣不敬刊本鱣訛鴈據周禮改注同

第十二頁前七行斷酒戒下刊本有庾闡斷酒戒

至損舛瓚六十四字按此文全載後酒五不應
重出今照前後體例節去改注詳下二字

第十六頁前一行章質夫刊本章訛張據東坡集
改



總校官庶吉士臣張能照

校對官編修臣裴謙

謄錄監生臣曹秀榆